

■ COLUMNA

Sco ins dumbra, uschia il resultat

DA BERNARD CATHOMAS

Ins vuleva dumbrar ils Rumantschs cun la metoda da l'imperatur Augustus dad avant 2000 onns ch'aveva dà il cumond «che tut ils abitants da l'imperi roman hajan da vegnir inscrits en glistas da taglia» (Lucas 2, 1). Ed uss èn ins surstà che strusch 9000 èn s'inscrits.

La metoda biblica funzionava perquai che l'imperatur saveva sfurzar ses subdits da s'inscriver a tuts custs. Oz na san ins betg pli cumandar e sancziunar uschia. Quai è l'emprim motiv che la metoda biblica disgescha sco instrument statistic. In segund motiv: La cuminanza rumantscha n'è betg in club u in'uniun d'interess nua ch'ins s'inscriva e sa declara sco commember. Ella è multifara, moderna, maschadada, individualista. Tants chaus, tantas opiniuns, tantas resalvas.

Nus essan carstgauns/umans dal 21avel tschientaner che discurran – dasper auters linguatgs – er rumantsch. Tuts èn almain bilings, mo paucs vulan sa fixar sin ina suletta identitad e sa confessar sco Rumantschs. Ils temps dals confess èn passads, betg mo en dumondas da linguatg. I dat perquai millis che na s'inscrivan betg, per motivs chapibels, malgrà ch'els san rumantsch.



Tgi crai da sa declarar uschia sco Rumantschun e na vul e po esser in Rumantsch «cun tgierp ed olma». Tgi è da princip encunter s'inscriver en glistas. Anc auters han forsà difficultads cun las instituziuns che vulan far s'inscriver. E baininqual n'ha insumma anc mai udi da l'acziun perquai ch'el na legia rumantsch, er sche quel è ses linguatg da mintga di.

Tuttina èn quasi 9000 (nov milli!) personas s'inscrittas. Ins s'imagineschia in'uniun u partida grischuna cun 9000 commembers. Cun questa cifra san ins esser fitg cuntent, er sch'ella n'ha nagina valor statistica. I sa tracta probabel dals 10% fin maximal 20% da tut ils pertutgads.

Far statistica è oz ina scienza. Per arrivar a resultats valabels dovri metodas sofisticadas. Las davosas cifras dad ina dumbraziun dal pievel detagliada dateschan da l'onn 2000. Lezza giada han ins dumandà mintgin, qual linguatg ch'el sa il meglier e

quals linguatgs ch'el discurra er anc en famiglia ed a la lavur. Già 1990 aveva la confederaziun renunzià da dumandar s'enter il «Linguatg matern». Quai aveva effectüà ina perdita perquai che blers Rumantschs crain da savair meglier tudestg.

Dapi l'onn 2000 n'hai betg pli dà ina dumbraziun dal pievel chau per chau. Ils statistichers lavuran oz cun enquistas, dumondan paucas personas e concludan da quellas sin l'entir. Uschia exista il privel che minoritads – betg mo la rumantscha – sa perdan en la massa.

Ifiss perquai urgent che la Rumantschia pretendess il 2019 da l'Uffizi federal da statistica sin via politica pussè ina giada ina dumbraziun ed analisa detagliada cun ina metoda adattada. Quella stuess alura er definir tgi che vala sco Rumantsch: Quels e quellas che discurran, er da derivanza estra, pia er personas integradas dal Portugal e dal Balcan. Quels che vegnan a frida en rumantsch, er sch'els na san betg perfetg la lingua. Quellas che vivan dapi generaziuns ordaifer il territori ed èn anc adina attachadas. Tenor mai er quels ch'han simpatia e sustegnan la cuminanza.

En l'avegnir èn tut quellas personas uschè impurtantas sco quellas s'inscrittas en la glista tenor la metoda biblica.